



Broj: 04-14-29956-8/16
Sarajevo, 09.12.2016. godine

Na osnovu člana 69. stav (2) tačka d), člana 70. i člana 100. Stav (3) Zakona o javnim nabavkama ("Službeni glasnik BiH", broj: 39/14), rješavajući po žalbi ponuđača UBE STORE d.o.o Tuzla izjavljenoj na Odluku o izboru najpovoljnijeg ponuđača broj 04-14-29956-5/16 od 22.11.2016. godine u otvorenom postupku javne nabavke – Nabavka 12 novih minibusu za javni gradski prijevoz, Ministar saobraćaja Kantona Sarajevo, na preporuku Komisije za javne nabavke imenovane Rješenjem broj: 04-14-29956-2/16 od 12.10.2016. godine, d o n o s i

ODLUKU

o usvajanju žalbe ponuđača i poništenju postupka javne nabavke

1. Usvaja se žalba ponuđača UBE STORE d.o.o. Tuzla, ul. Ivana Markovića Irca br.68 na Odluku o izboru najpovoljnijeg ponuđača broj 04-14-29956-5/16 od 22.11.2016. godine u otvorenom postupku za javnu nabavku: Nabavka 12 novih minibusu za javni gradski prijevoz,
2. Poništava se otvoreni postupak javne nabavke: Nabavka 12 novih minibusu za javni gradski prijevoz pokrenut Odlukom o pokretanju postupka broj 04-14-29956-1/16 od 12.10.2016. godine
3. Odluka stupa na snagu danom donošenja, biće dostavljena svim ponuđačima koji su učestvovali u postupku javne nabavke, te će se objaviti na internet stranici Ministarstva saobraćaja Kantona Sarajevo u skladu sa članom 70. stav 6. Zakona o javnim nabavkama BiH („Sl.glasnik BiH“, broj:39/14)

O b r a z l o ž e n j e

Na osnovu Odluke o pokretanju postupka broj 04-14-29956-1/16 od 12.10.2016. godine, Ministarstvo saobraćaja je pokrenulo otvoreni postupak za javnu nabavku: Nabavka 12 novih minibusu za javni gradski prijevoz.

Obavještenje o nabavci broj 1242-1-1-4-3-12/16 od 13.10.2016. godine objavljeno je na Portalu javnih nabavki, te u Službenom glasniku BiH broj 79/16 od 21.10.2016. godine.

Iz zapisnika o pregledu i ocjeni ponuda je utvrđeno da je Komisija za javnu nabavku dana 22.11.2016. godine sa početkom u 15 sati izvršila javno otvaranje blagovremeno prispjelih ponuda slijedećih ponuđača: "UBE STORE" d.o.o Tuzla, ul. Ivana Markovića Irca br.68 i "Sejari" d.o.o Sarajevo, ul. Blažuj br.78.

Nakon pregleda ponuda Komisija za javne nabavke je napravila rang listu prihvatljivih ponuđača za postupak javne nabavke 12 novih minibusu za javni gradski prijevoz kako slijedi:



web: <http://ms.ks.gov.ba>
e-mail: ms@ms.ks.gov.ba
Tel: + 387 (0) 33 562-058, + 387 (0) 33 562-059
Sarajevo, Reisa Džemaludina Čauševića 1





- "Sejari" d.o.o Sarajevo- 98,60 bodova
- "Ube Store" d.o.o Tuzla- 97,33 bodova.

Komisija za javnu nabavku je ponudu ponuđača "Sejari" d.o.o Sarajevo ocijenila kao prihvatljivu u skladu sa kriterijumom "ekonomski najpovoljnija ponuda", sa podkriterijima: cijena 95% i rok isporuke 5% .

Na osnovu prihvaćene preporuke Komisije za javne nabavke donesena je Odluka o izboru najpovoljnijeg ponuđača broj 04-14-29956-5/16 od 22.11.2016. godine u postupku nabavke 12 novih minibusu za javni gradski prijevoz, kojom je ponuda ponuđača "Sejari" d.o.o Sarajevo je ocjenjena kao najpovoljnija sa ukupnom cijenom od 1.948.752,00 KM sa PDV-om.

Odluka o izboru najpovoljnijeg ponuđača broj 04-14-29956-5/16 od 22.11.2016.godine sa zapisnikom o pregledu i ocjeni ponuda dostavljena je svim ponuđačima koji su učestvovali u postupku predmetne javne nabavke objavljena na web stranici Ministarstva saobraćaja.

Ponuđač "UBE STORE" d.o.o Tuzla je dana 28.11.2016.godine podnio zahtjev za uvid u tendersku dokumentaciju u predmetnom postupku. Rješenjem Ministarstva saobraćaja broj 04-14-33778/16 od 28.11.2016.godine dozvoljen je pristup traženim informacijama u prostorijama ovog Ministarstva istog dana u 13 h.

Uvid u traženu dokumentaciju izvršen je od strane ovlaštenog predstavnika ponuđača "UBE STORE" d.o.o Tuzla Edina Uzeirbegovića u prostorijama Ministarstva saobraćaja u prisustvu lica ispred komisije za javnu nabavku.

Nakon obavljenog uvida ponuđač "UBE STORE" d.o.o Tuzla je dana 06.12.2016.godine putem centralnog protokola Kantona Sarajevo izjavio žalbu na Odluku o izboru najpovoljnijeg ponuđača, koja je putem interne dostavne knjige od strane Ministarstva saobraćaja zaprimljena dana 07.12.2016.godine.

U svojoj žalbi podnosilac žalbe navodi:

"Ponuda ponuđača SEJARI d.o.o Sarajevo ne ispunjava uslove u pogledu Garancije uz ponudu, član 61. Zakona o javnim nabavkama Ugovorni organ je u tenderskoj dokumentaciji broj nabavke: 04-14-29956-5/16 od 13.10. 2016. Godine u tački V. propisao da „Garancija za ozbiljnost ponude dostavlja se u originalu, u zatvorenoj plastičnoj foliji (koja se npr. na vrhu zatvori naljepnicom na kojoj je stavljen pečat ponuđača ili se otvor na foliji zatvori jamstvenikom, a na mjesto vezivanja zalijepi naljepnica i otisne pečat ponuđača) i uvezana u cjelinu čini sastavni dio ponude. Garancija ne smije biti ni na koji način oštećena (bušenjem i sl.) jer probušena ili oštećena garancija se ne može naplatiti. Ukoliko garancija za ozbiljnost ponude nije dostavljena na propisan način ugovorni organ je obavezan takvu ponudu odbaciti.“

U ponudi ponuđača „SEJARI“ d.o.o Sarajevo, Garancija za ozbiljnost ponude nije dostavljena u skladu sa uputstvom iz TD, tj. na zaljepljenoj naljepnici na mjestu zatvaranja folije nije otisnut pečat. Način na koji je ponuđač dostavio garanciju za ozbiljnost ponude, nije u skladu sa tačkom V. TD, članom 61. Zakona o javnim nabavkama BiH i Pravilnikom o obliku garancije za





ozbiljnost ponude ("Službeni glasnik BiH", broj: 90/14), te je ugovorni organ bio obavezan u skladu sa članom 3. Stav (3) navedenog Pravilnika takvu ponudu odbaciti."

Navod iz žalbe je osnovan, iz razloga što je na strani 80. ponude ponuđača „Sejari” d.o.o Sarajevo dostavljena garancija koja u potpunosti ne ispunjava formu propisanu članom 3 Pravilnika o formi garancije za ozbiljnost ponude i izvršenje ugovora, (Sl.glasnik BiH, br.90/14) i načinu dostavljanja garancije propisane pripadajućom tenderskom dokumentacijom pod tačkom V na strani 11, odnosno na zaljepljenoj naljepnici na mjestu zatvaranja folije nije otisnut pečat ponuđača.

Članom 3. stav 3. Pravilnika o formi garancije za ozbiljnost ponude i izvršenje ugovora, (Sl.glasnik BiH, br.90/14) utvrđeno je da: „Ukoliko garancija za ozbiljnost ponude nije dostavljena na propisan način shodno stavu 1. Ovog člana, ugovorni organ je obavezan takvu ponudu odbaciti. Odredbama člana 3.stav 1. Istog Pravilnika utvrđeno je: „ Garancija za ozbiljnost ponude dostavlja se u originalu, u zatvorenoj plastičnoj foliji (koja se npr. na vrhu zatvori naljepnicom na kojoj je stavljen pečat ponuđača ili se otvor na foliji zatvori jamstvenikom, a na mjesto vezivanja zalijepi naljepnica i otisne pečat ponuđača) i uvezana u cjelinu čini sastavni dio ponude.

Cijeneći navedene odredbe Pravilnika o formi garancije za ozbiljnost ponude i izvršenje ugovora, (Sl.glasnik BiH, br.90/14) ugovorni organ je ponudu ponuđača „Sejari” d.o.o Sarajevo odbacio kao neprihvatljivu.

Dalje podnosilac žalbe navodi:

"Trebalo bi dodati i činjenicu da je ponuđač „SEJARI“ d.o.o Sarajevo rok za isporuku robe u svojoj ponudi odredio 28 dana, što je nerealno kratak rok koji neće biti u prilici ispoštovati, te da ugovorni organ mora voditi računa o formi i obliku garancije za ozbiljnost ponude kako bi mogao u postupku nabavke 12 novih minibusu obezbijediti ozbiljnost dostavljene ponude, te se osigurati za mogućnost naplate garancije."

Navod iz žalbe nije osnovan, iz razloga, što se žalitelj "UBE STORE" d.o.o Tuzla svoj stav zasniva na pretpostavkama da ponuđač "SEJARI" d.o.o Sarajevo neće moći ispoštovati rok za isporuku vozila koji je dao u ponudi bez i jedne valjane činjenice kojom tu tvrdnju potkrepljuje.

Ugovorni organ je tenderskom dokumentacijom obavezao odabranog ponuđača da u slučaju dobijanja ugovora dostavi: Garanciju za uredno izvršenje ugovora, a ista se dostavlja u originalu, u roku od 10 dana od dana zaključivanja/obostranog potpisivanja ugovora. Garancija za uredno izvršenje ugovora predstavlja garanciju ugovornom organu da će ponuđač koji je dobio posao ispoštovati sve obaveze preuzete ugovorom.

Također podnosilac žalbe navodi:

"Takođe, ugovorni organ je TD u tački IV podaci o ponudi, precizirao šta svaka ponuda treba da sadrži, kako bi se smatrala potpunom. Ponuda ponuđača SEJARI d.o.o Sarajevo ne sadrži Prilog 11 – garancija za uredno izvršenje ugovora, te je i po ovom osnovu morala biti odbačena. "





Navod iz žalbe **nije osnovan, iz razloga**, jer je ponuđač "SEJARI" d.o.o Sarajevo dostavio Izjavu koja je tražena tenderskom dokumentacijom pod tačkom V te je ista dostavljena kao prilog ponude. Ukoliko njegova ponuda bude odabrana kao najpovoljnija ponuđač je dužan dostaviti garanciju u roku od 10 dana od dana zaključivanja/obostranog potpisivanja ugovora, u obliku bezuslovne bankarske garancije u iznosu od 10% od vrijednosti ugovora, sa klauzulom plativo na prvi pisani poziv korisnika garancije i bez prava prigovora, sa rokom važnosti do dana isporuke minibusa i potpisivanja zapisnika o primopredaji minibusa od strane predstavnika ugovornog organa. Prilog 11 – Garancije za uredno izvršenje ugovora dostavlja se u originalu, u roku od 10 dana od dana zaključivanja/obostranog potpisivanja ugovora.

Slijedom navedenog ugovorni organ je žalbu ponuđača- žalitelja ocijenio kao djelimično osnovanom, pa je iz gore navedenih razloga ponuda ponuđača „Sejari” d.o.o Sarajevo ocijenjena kao neprihvatljiva.

Nakon evaluacije žalbe komisija je postupajući u skladu sa Zakonom o javnim nabavkama izvršila ponovnu evaluaciju drugih ponuda u predmetnoj javnoj nabavci i utvrdila je slijedeće: Kod ponude ponuđača „UBE STORE“ d.o.o Tuzla utvrđena je identična neusklađenost dostavljene ponude sa zahtjevanim uslovima iz tenderske dokumentacije. Naime, nakon pregleda dostavljene garancije konstatovano da ponuda ponuđača „UBE STORE“ d.o.o Tuzla na strani 75. sadrži bankarsku garanciju koja je dostavljena u plastičnoj foliji, ali ista nije na vrhu folije zatvorena naljepnicom niti je na istoj stavljen pečat ponuđača, te s tim u vezi ponuda ponuđača „UBE STORE“ d.o.o Tuzla broj 04-14-33405/16 od 22.11.2016.godine je odbačena kao neprihvatljiva iz razloga neusklađenosti sa uslovima iz tenderske dokumentacije.

Na osnovu prezentiranih činjenica ugovorni organ je ocijenio da je i ponuda ponuđača „UBE STORE“ d.o.o Tuzla neprihvatljiva u smislu odredbe člana 69. stav 2. tačka d) Zakona o javnim nabavkama čime se okončava postupak javne nabavke iz razloga što ni jedna od primljenih ponuda nije prihvatljiva.

Imajući u vidu sve navedeno, ugovorni organ je ponude ponuđača UBE STORE d.o.o Tuzla i Sejari d.o.o Sarajevo odbacio kao neprihvatljive, te je u skladu sa Zakona o javnim nabavkama BiH donio odluku kao u dispozitivu.





Pouka o pravnom lijeku:

Protiv ove Odluke može se izjaviti žalba Uredu za razmatranje žalbi, putem ugovornog organa u roku od pet (5) dana od dana prijema Odluke.

Ponudač, u slučaju da ulaže pismenu žalbu, dužan je za pokretanje žalbenog postupka platiti naknadu u iznosu 7.500,00 KM, u skladu sa članom 108. stav 1. tačka f) Zakona o javnim nabavkama.

Naknada se uplaćuje u korist budžeta institucija BiH i međunarodnih obaveza BiH i ona je nepovratna u slučaju neosnovane žalbe.

Dostaviti:

- Ube Store d.o.o. Tuzla
Ul. Ivana Markovića Irca br.68
75 000 Tuzla
- Sejari d.o.o
Ul. Blažuj br.78.-Ilidža
- Evidenciji
- Arhivi



MINISTAR
Dr.sc Mujo Fišo



